

Fasnacht 2021

Blagèèr!



e VSG Bangg

Mir frooge uns was isch dr Grund
Dass Corona Zahl z'Ziri nit aabe kunnt
Mir finde's uuse bim Fakte tschegge
Mit so eme Lümpli kasch kai Ziirischnurre degge

Fyr neyi Flieger saage d'Stimmbürger joo
Ab dem Ergäbnis isch unseri Amhård froo
Hauptufgoob vo de Flieger isch denne go mässe
Wieviil Schöffli der bösi Wolf duet frässe

Nach knapp zwai Wuche me glaubts jo kuum
Isch dr Trump wider gsund und gege Corona immun
Me hett ihm au kai Medkamänt miesse verschriibe
bi so eme Typ mecht dä Virus nit bliibe

Im Frielig do hetts e harte Lockdown gee
Das hann i kenne locker nee
Was mi viil herter droffe hett
Isch dr Lockdown deheim vo dr Frau im Bett

Friener het me zur Begriessig s' Hüettli glupft
Zu Coronazyte wird mit em Ellebooge gstupft
Fyr zu Adiee saage do duesch jetzt wingge oder
em andere aifach ins Fudi gingge

D Martullo isch im Root mit Mundschutz umegrennt
Au mit derre Vermummig hänn sie alli kennt
Zwar seet me si nimmi die Blocherschnuure
Aber dr Mischt wo sie verzellt kunnt ainewäg duure

Dr König vo Spanie hett bschisse und glooge
Jetzt hett ar drum au dr Blindi zooge
Bi uns in Basel isch es nitt esoo
Der Burgener isch immer no doo

Dr Trump verlosst d'Biihni voller Wuet und Fruscht
D'Ami hän e Alte gege e Uralte tuscht
Villicht bruchts eher e Junge fitte
Wo dä Riss durchs Land nomol kennti kitte

Wottsch au by uns bänggle?
Uff www.vsg-basel.ch erfahrsch meh!

